

**Ni Presidente
Dieter F. Uchtdorf**

Maikadua a Mammagbaga iti
Umuna a Pangulu



Panangsapul ken ni Cristo iti Paskua

Iti amin nga agtarigagay tapno maawatan no asinotayo kas miembro ti Ti Simbaan ni Jesucristo dagiti Santo iti Ud-udina nga Aldaw, kayatko nga isingasing ti lugar a panangirugiyo a panangsukisok nga ilawlawag dagitoy tallo a balikas: Sapulentayo ni Cristo.

Agkalikagumtayo a mangsursuro ti maipapan Kenkuana. Mangsurot Kenkuana. Agbalin nga ad-adda a kas Kenkuana.

Inaldaw iti unos ti tawen, kalikagumantayo ti mangsapul Kenkuana. Ngem nangnangruna iti daytoy a panawen ti tawen—Paskua, no rambakantayo ti pannakayanak ti ayayatentayo a Mangisalakan—ad-adda a maipamaysa dagiti puspustayo Kenkuana.

Kas paset dagiti panagsaganatayo iti panangrambak iti Paskua, panunotentayo koma no kasano a nagsagana a sumarabo dagiti nagbiag dua ribu a tawen ti napalabasen tapno sarabuenda ti idadateng ti Mangisalakan.

Dagiti Agpaspastor

Ditayo unay ammo ti maipanggep kadagiti agpaspastor, ammotayo laeng nga isuda dagiti “agyan iti away nga agay-aywan nga agpuyat iti rabii kadagiti animalda.”¹ Dagiti agpaspastor a nagnangruna pay ngem iti gagangay a tattao, kas iti adu a nasingsingpet a tattao nga agtrabaho iti inaldaw tapno adda pagbiagda.

Maibagianda dagiti tao nga, iti maysa a gundaway, mabalin a saanda a sireregta nga agsapsapul ken ni Cristo, ngem nagbalaliw dagiti pusoda idi naglukat dagiti langit ket naiwaragawag ni Cristo kadakuada.

Isuda dagiti tao a, kalpasan ti panangdenggegda iti timek dagiti nailangitan a mensahero, napanda a dagus iti Betlehem iti panagtarigagayda a makita isuna.²

Dagiti Masirib a Lallaki

Dagiti masirib a lallaki ket agad-adal iti idadateng ti Mesias, ti Anak ti Dios. Babaen kadagiti sursuroda, nailasinda dagiti tanda a nangipakita iti pannakayanakna. Idi nailasinda dagitoy, pinanawanda dagiti pagta-enganda ket nagbaniagada a napan iti Jerusalem, nga agsalsaludsod, “Sadino ti yan dayta nayanak nga Ari dagiti Judio?”³

Ti pannakaammoda maipapan ken ni Cristo ket saan a nagtalinaed nga adal laeng. Apaman a nakitada dagiti tanda ti pannakayanakna, nagtignayda. Rinugianda ti nagbaniaga a mangsarak ken ni Cristo.

Dagiti masirib a lallaki ti mangibagi kadagiti agsapsapul ken ni Cristo babaen ti panagsursuro ken panagadal. Ti debosionda iti kinapudno in-inut a nangiturong kadakuada a mangsarak ken ni Cristo ken agrukbab Kenkuana kas Ari dagiti ari, ti Mangisalakan ti sangkatawan.⁴

Da Simeon ken Ana

Da Simeon ken Ana ti mangibagi kadagiti agsapsapul ken Cristo babaen ti Espiritu. Dagitoy a nakaskasdaaw a kararua ket napasnek a relihioso ken, babaen ti panagayuno ken panagkararag, ken babaen ti panagbiagda nga addaan kinapasnek ken kinamanagtungpal, sigagagar nga inur-urayda ti aldaw ti idadateng ti Anak ti Dios.

Babaen ti kinapudno, kinapakumbaba, ken pammati, siaanus a pinadpadaananda ti idadateng ti Mangisalahan.

Iti kamaudiananna, nagunggonaan ti kinapudnoda idi indatag da Maria ken Jose kadakuada ti maladaga nga iti maysa nga aldaw awatennanto iti Bagina dagiti basabasol ti sangkatawan-an.⁵

Dagiti Mamatpati kadagiti Nephite ken Lamanite

Ti makasagid-rikna nga estoria maipapan no kasano a pinadpadaanan dagiti mamatpati iti Baro a Lubong dagiti tanda ti pannakayanak ti Mangisalahan ket masarakan iti Libro ni Mormon.

Malagipyo a nauy-uyaw ken naparparigat dagiti addaan iti pammati ken ni Cristo. Pinabasol dagiti sopistikado iti dayta nga aldaw dagiti mamatpati gapu iti agtultuloy a panangsuportada kadagiti minamaag a pammati. Kinapudnona, ipukpukaw dagiti saan a mamatpati ti panaguyawda ta “inyikkisda” iti pagilian (3 Nephi 1:7). Kinatkatawaanda dagiti namati a mayanakto ti Mangisalahan.

Kasta unay ti pungtot ken gurada gapu ta tinarigagayandan ti mangpapatay iti amin a mamati iti Mangisalahan. Insurat ti Libro ni Mormon ti makatignay-rikna a panggeddeng.⁶

Dagiti mamatpati a nagbiag iti daytoy a panawen ket mangibagi kadagiti agsapsapul ken ni Cristo uray pay no katawaan, uyawen, ken laisen ida dagiti dadduma. Sapulenda ni Cristo uray no panggep nga inuulbod nga itakder ida dagiti dadduma kas managbasol, awanan adal, wenna nalaka a mamati.

Ngem ti gura dagiti dadduma ket saan a nangpaay iti namnama dagiti pudno a mamatpati iti panangsapsapulna ken ni Cristo.

Sapulentayo ni Cristo

Iti unos ti tawen, ken nalabit a nangnangruna iti daytoy a panawen ti Paskua, pagsayaatantayo no damagentayo ti saludsod “Kasano ti panangsapsapulko ken Cristo?”

Kabayatan ti narigat a panawen ti biagna, insurat ti naindaklan a ni Ari David, “O Dios, sika ti Diosko, sigaganetgetakto a mangbirok kenka; toy kararuak mawaw kenka, ti lasagko segseggaannaka.”⁷

Nalabit daytoy nga ugali a panangsapsapul ken ni Cristo ket maysa kadagiti rason nga inladawan ni David kas maysa a tao nga umasideg iti puso ti Dios.⁸

Kabayatan daytoy a panawen ti Paskua ken iti unos ti intero a tawen, sapulentayo koma iti puspuso ken karkaruaruatayo ti ay-ayatentayo a Mangisalahan, ti Prinsipe ti Kappia, ti Nasantuan ti Israel. Para itoy a tarigagay, iti kaaduanna a paset, mangilawlawag saan laeng iti kinasiasinotayo kas miembro ti Ti Simbaan ni Jesucristo dagiti Santo iti Ud-udina nga Aldaw no di ti pudno a kinasiasinotayo kas disipulo ni Cristo.

DAGITI NAGADAWAN

1. Lucas 2:8.
2. Kitaen iti Lucas 2:15.
3. Kitaen iti Mateo 2:1–2.
4. Kitaen iti Mateo 2:11.
5. Kitaen iti Lucas 2:22–38.
6. Kitaen iti 3 Nephi 1.
7. Salmo 63:1.
8. Kitaen iti Dagiti Aramid 13:22.

PANANGISURO MANIPUD ITI DAYTOY A MENSAHE

Kasano a nasaysayaat a masapulantayo ni Cristo, kas isingasing ni Presidente Uchtdorf? Mabalín nga allukoyenyo dagiti sursuruanyo a mangsaludsod iti bagbagida, “Kasano ti panangsapsapulko ken ken Cristo?” Awisen ida a mangrugi a mangibinglay no kasano nga agsapsapul ti tuggal maysa ken Cristo kabayatan ti oras a sangapamiliaan a panagadalda iti nasantuan a kasuratan iti inaldaw. Mabalinyo met a buyaen iti *Mormon.org* ti video iti Paskua a kaduayo dagiti sursuruanyo ken awisen ida a makiraman iti daytoy tinawen a gundaway a mangsapul ken ni Cristo babaen ti panangsuot kadagiti pannursurona.

Panangpadpadaan ken ni Jesus

Adu a tattao ti nangpadpadaan ken naguray ken Jesus a mayanak. Ita agpadaan ken aguraytayo Kenkuana nga umay manen! Makapagsaganatayo babaen ti panagsursuro maipapan ken ni Jesus ken panangsurot Kenkuana. Kasano a surotenyo ni Jesus? Mangidrowing iti bituen ket isuratyo dagiti kapanunotanyo iti uneg daytoy.



Pammati Pamilia Tulong

Siaayat a Makipagbaklay iti Imet ti Tunggal Maysa

Nainkararagan nga adalenyo daytoy a material ken kalikagumanyo ti inspirasion tapno ammuen no ania ti ibinglayyo. Kasano a ti pannakaawattayo iti panggep ti Relief Society ket mangisagananto kadagiti annak a babbai ti Dios para kadagiti bendision ti agnanayon a biag?

“N^apalikmutantayo kadagiti Nagkasapulan iti atensiyantayo, iti panangallukoytayo, iti suportatayo, iti liwliwatayo, iti panangngaasitayo,” kinuna ni Presidente Thomas S. Monson. “Datayo dagiti ima ti Apo ditoy daga, nga addaan iti bilin nga agserbi ken mangitag-ay kadagiti annakna. Isu ket agpannu-ray iti tunggal maysa kadatayo.”¹

Kinuna ni Presidente Henry B. Eyring, Umuna a Mammagbaga iti Umuna a Panguluhen: “Nangrugi ti dakkel a panagbalbaliw iti pusoyo idi immaykayo iti Simbaan. Nagaramidkayo iti katulagan ken inawatyo ti kari a nangrugi iti panagbalbaliw iti mismo nga ugaliyo. . . .

“ . . . Inkariyo a tulonganyo ti Apo a mangpalag-an iti imet dagiti [dadduma] ket maliwliwaan. Naik-kankayo iti bileg a mangtulong a mangpalag-an kadagiti imet idi inawatyo ti sagut ti Espiritu Santo.”²

“Kayattayo nga usaren ti silaw ti ebanghelio tapno kitaentayo dagiti dadduma kas iti ar-aramiden ti Mangisalakan—nga addaan iti

panangngaasi, namnama,” kinuna ni Jean B. Bingham, Relief Society General President. “Dumtengto ti aldaw a naan-anay a maawatantayo to ti puspuso dagiti dadduma ken agyamantayo iti asi a naipaay kadatayo—kas iti ipaaytayo a naasian a pampanunot ken balikas kadagiti dadduma. . . .

“Pagrebbengan ken pribilehiotayo ti umarakup iti panagsayaat iti *tunggal maysa* bayat ti panangikari-gatantayo nga agbalin nga ad-adda a kas iti Mangisalakantayo.”³

Bayat ti panangibaklaytayo iti imet ti ti tunggal maysa ken panagtungpal kadagiti katulagantayo, luktantayo ti dalan para ken Jesucristo a mangagas iti dadduma. Insuro ni Elder Jeffrey R. Holland ti Korum dagiti Sangapulo-ket-dua nga Apostol: “Iti panangibilang iti saan a matukod a pateg ti Pannakailansa iti Krus ken ti Pannubbot, ikarik kadakayo a saannanatay a baybay-an ita. Idi kinunana daytoy iti addan nakurapay nga espiritu, ‘Umayka kaniak,’ Kayatna a sawen

nga ammona ti dalan a rummuar ken ammona ti dalan nga agpangato. Ammona daytoy gapu ta nag-naannan daytoy. Ammona ti dalan gapu ta Isu *ti* dalan.”⁴

Dagiti Mainayon a Nasantuan a Kasuratan

Mateo 25:40; Taga Galacia 6:2;

Mosiah 2:17; 18:8–9

DAGITI NAGADAWAN

1. Thomas S. Monson, “Serve the Lord with Love,” *Liahona*, Feb. 2014, 4.
2. Henry B. Eyring, “The Comforter,” *Liahona*, Mayo 2015, 18.
3. Jean B. Bingham, “I Will Bring the Light of the Gospel into My Home,” *Liahona*, Nob. 2016, 6, 8.
4. Jeffrey R. Holland, “Broken Things to Mend,” *Liahona*, Mayo 2006, 71.

Ibilang Daytoy

Kasano a ti panangtulong a makipagbaklay iti imet dagiti dadduma ken panagtungpal kadagiti katulagan ket manglukat it dalan para ken Jesus a mangagas kadagiti agkasapulan?